

學

易

集

一



學 易 集
(一)

劉 跂 著

四庫總目提要

學易集。宋劉跂撰。跂字斯立。東光人。家于東平。尚書右僕射摯之子也。宋史附見摯傳。稱其能文章。遭黨事。爲官拓落。家居避禍。以壽終。而不詳著其仕履。惟晁說之景迂生集有所作跂墓誌。稱跂登元豐二年進士。初選亳州教授。元祐初。除曹州州學教授。以雄州防禦推官知江州彭澤縣。其後改管城。蘄水。所至有政聲。復主管成都府永寧觀。政和末。以朝奉郎卒。所敍生平梗槩。頗爲詳悉。說之又稱跂晚作學易堂。鄉人稱爲學易先生。其集名蓋取諸此也。紹聖初。摯以黨籍貶新州。卒于貶所。建中靖國初。跂伏闕籲冤。得復官。昭雪。世稱其孝。呂本中東萊詩話稱跂初登科。就亳州。見劉攽所稱引。皆所未知。于是始有意讀書。厥後與孫復。石介名相埒。蓋其行誼學問。均不愧于古人。所作古文。類簡勁有法度。詩則多作黃庭堅體。雖時露生拘。要自落落無凡語。江西宗派圖中不列其名。殆以摯爲朔黨。門戶不同歟。然淳熙中。呂祖謙奉詔修文鑑。多取跂作。其辨冤時上執政啓。所云晚歲離騷。魂竟招于異域。平生精爽。夢猶託于故人者。呂本中詩話及王銍四六話。亦均推其隸事之工。卽以文章而論。亦北宋末年卓然一作者矣。其集原本二十卷。陳振孫書錄解題謂最初李相之得于跂甥蔡瞻明。紹興間。洪邁傳于長樂官舍。後施元之刻板行世。宣防宮賦。學易堂記。世尤傳誦。今元之舊刻。久無傳本。惟永樂大典內所載跂詩文頗多。雖未免有所脫佚。而掇拾排次。尙可得十之

六七共錄爲十有二卷。今恭承聖訓于刊刻時削去青詞以歸雅正。其同天節道場疏、管城縣修獄道場疏、供給看經疏、北山塑像疏、靈泉修告疏、仁欽陞坐疏、請崇寧長老疏以及爲其父母舅氏修齋諸疏皆跡涉異端與青詞相類亦槩爲刪除。謹重加編次勒爲八卷併敬錄諭旨并諸卷首用昭鑑古斥邪之訓垂萬世擇言之準焉。

學易集目錄

卷一

賦一首

五言古詩二十七首

卷二

五言古詩十九首

七言古詩十首

卷三

五言律詩四十五首

五言排律三首

七言律詩三十四首

卷四

五言絕句十八首

七言絕句六十三首

卷五

表十一首

露布二首

策問七首

啓六首

書七首

卷六

序十一首

碑一首

題跋三首

卷七

傳二首

卷八

誌銘十首

誄一首

記五首

贊三首

銘四首

誌銘六首

行狀二首

祭文六首

學易集卷一

賦

宣防宮賦

余以事抵白馬。客道漢瓠子事。感其語。故賦。

元封天子既乾封。臨決河。沈璧及馬。慷慨悲歌。河塞築宣防之宮。燕其羣臣。乃稱曰。隕林竹兮。捷石落。宣防塞兮。萬福來。顧盼意得。詔問東方大夫樂乎。朔進而跽曰。君王佩乾符。妥坤靈。封岱岳。禪云亭。雷行姦馳。一蹕四海。力餘氣盈。爰覽德水。至于人靡。造智天不愛祉。石城金墉。屹立亭峙。則又經廣輪。度棟宇。徘徊領略。心解目覩。八隅九維。千門萬戶。沈嚴神麗。秦帝之府。于是植翠華。噴靈囿。觴川流。浩長歌。神哉沛君。心和忠去。喜至無所復加。可謂樂矣。然臣觀之。未可謂無憂也。天子愕眙不怡。少焉顧曰。亦有說乎。朔再拜曰。主臣。蓋聞大川之源。發乎崑崙。崑崙之神墟。出陽紆與陵門。導積石而沈浮。包渾淪與俱遊。羌聲聲其徂征。千里一曲。萬里九折。盤礴瀆滉。呼飲洶涵。蕩然長波。激爲迅湍。莽不知其幾何。遂異派而同瀾。已而略廣武。循大伾。麟沛麟洛。積爲委輸。漢沸出乎地上。悅莫際其焉如。粵若神禹。繼道作德。範圍天儀。聯絡地脈。疏排渙漫。鑄鑿峯峯。平野其藝。人有安宅。化鱗介爲冠冕。蓋千有八百國。臣曾問遺黎。遵海隅。絲平

宋 劉 跂 撰

成之徒駭。下東光之胡蘇。淵然覆鰭。脩若馬頰。如鬲及盤。以簡以潔。太史分流。參隕衆折。然後安翔徐回。脈脈並醺。紆餘衍漾。縣眇逶迤。虬潛蛟伏。波不得興。視榮光與休氣。茂玉檢而金繩。煥乎三日而五色。何必千歲而一清。若夫羣雄逐兮。位隔并。山川圍兮。氣弗宣。託洶湧以爲貨兮。阻厓巖以自藩。崇墉連蜷。蠱以相雜兮。巨浸澆滯。汨乎宛延。立遮害之亭。謹白馬之津。雉堞瞰其東。甌脫臨其西。又東北留其行。又西北擊其歸。垂天之翼。橫海之鱗。脰墮膠葛。曾不得搶榆枋而泛蹄涔。芻芻勃鬱。靡所容怒。霆擊電掣。敎已脫兔。益以桃花之流。駛乎竹箭之馭。彌滿瀕洞。千里四顧。乃始伐薪石。程畚鍤。汰鷄距之防。橫鋸牙之木。上下連環。旁側伏闕。竹落千繹。夾艘而下。岌乎喘牛。蹶若蹊馬。糗糴齊山。徒庸成林。商羊鼓舞。澤門謳吟。析骸樵蘇。慘于長平之禍。累塊珠玉。埒乎水衡之藏。諒人謀之或違。將度數之適逢。今夫呼吸潮汐。關竅丘源。洲潭浮空。滙洄旁穿。非乍甘而撤舍。麥未槁而培根。何靈鼈之下伏。寓三峯乎層巔。表秦紫之嵯峨。陋靈光之歸然。長封爲局。土鍵石鏽。守如嵒函。萬葉不拔。然而燕雀賀而人弔。枝葉茂而本撥。財乏力屈。河且再塞。君王方且駐屬車以流觀。啓離宮而落成。卻四載之乘。勞負薪之臣。舉烽賦酒。飛輪奉牲。戢長慮于一笑。起駕望而憑陵。神閒意定。澹然無營。語未旣。天子數顧尙席。推几欲興。臣朔逡巡卻立。不謝而退。其後館陶之役。竟如東方大夫言。

五言古詩

寄劉仲平

移居逼城阿。頗似山中住。當軒列佳石。繞舍紛高樹。園林便爲主。魚鳥欣相聚。春來物物好。意適隨所遇。是適本無因。亦復無定處。當有忘機人。知我此中趣。

重寄

憶昨去國初。置傳史所監。季也行泣隨。往舍都城南。沐我屢飯我。終此一日淹。明作分嶺水。苦別心如慙。過歸護犢重。卻掛東川帆。停橈憩汴泗。攬轡趨霍潯。間關又相對。共被棲窮簷。未畢十日歡。已復秣征驂。猗嗟季行役。曷日弛負擔。長懷芳草句。未讀衣已沾。先人門戶事。驚力詎克堪。一朝奇禍發。熾甚烈火炎。頑迷得憂辱。自取非謗讒。危巢風雨漂。菅蒯不足芟。于時季來歸。棄官不待占。收合敗散餘。賴此守獨嚴。闔門數百指。一一恩意涵。輯睦乖迂情。牢不見隙纖。聚糧非短穀。千里均屬厭。囊書動高聽。恩環賜東漸。吾親所奇貴。挺立故不凡。晚節就難冀。前非掩多慙。正如已甞人。歛起蒙鍼砭。衰顏積霜雪。幸亦解羈銜。昨從憂迫來。將復見安恬。西廊坐食菽。可以慰飢餓。漸欲親酒盞。頗思疎藥奩。願季愛玉體。象我及西崦。從今荷閒時。歡樂百無嫌。酬恩無處所。香火供瞿聃。

集句寄斯川

渺渺孤舟逝。計日望舊居。萬族各有託。吾亦愛吾廬。栖栖失羣鳥。暫與田園疎。今日始復來。再喜見友于。繭然睇崇丘。負疴不獲俱。試攜子姪輩。且還讀我書。親戚共一處。過此奚所須。起晚眠常早。誰謂形迹拘。厚恩固難忘。慨然念黃虞。養真衡茅下。不樂復何如。

寄馬全玉

歲月如歸鴻。秋至欲將翔。郊原帶爽氣。榆柳媚無光。客子抱幽獨。耿耿誰與明。不辭青鞋賤。來躡君子堂。君子松檜姿。勁不慘風霜。其交淡如水。衆口未易嘗。忘言默領會。此意卻難忘。不飲知酒趣。聊復酌公漿。寒燈夜寥閨。一笑未渠央。誰令別離此。夢寐長相望。

寄尹遷介叔〔案〕後五首。疊前五首韻。當別有標題。爲傳寫者脫去。連爲十首。

我生非良材。頑礪不受礪。讀書但漁獵。初不名一藝。形骸弱如柳。暑雨更疲曳。清風何時生。一掃去酷吏。孫友太瘦生。相遇一何闊。途窮欲改操。冉冉在故轍。贈君七年艾。輒爲兒女奪。養生有標本。姑息良已末。我有好詩酒。端爲舅氏作。陳遵見張竦。雖見不改樂。小官未朝謁。日日事飲博。書來託天真。笑我守糟粕。二尹山東秀。一第安足賀。滕侯薦鶚書。極口良未過。青衫五斗米。所要脫飢餓。自重士當然。蓄積非爲貨。前年郭法曹。寓直經略院。同時幕府歸。獨送兩秋燕。新書滿百帙。鉛槧老不倦。他時淮南子。試爲離騷傳。養志如養力。益峻在益礪。大方略畦畛。小智私才藝。古來要倔強。檻折不可曳。何謂薛韓君。小生敢相吏。擇術患不終。未易笑迂闊。發轍三尺輪。不改萬里轍。死生漢節共。巨猾氣爲奪。坐令李都尉。慟哭天壤末。鴟夷笑井瓶。同是意匠作。拘方等歸盡。放意差獨樂。往時二千石。天子償負博。彼視淑德侯。何堪貯糟粕。歌詞郢中來。未數白興賀。一斑昧全虎。端似隙中過。可憐光萬丈。不救妻子餓。平生嚴鄭公。卓犖有餘貨。吏隱非山林。州府爲道院。莫夸非食肉。虎頭領如燕。公田亦種蔬。暫去飛鳥倦。何用肅德施。先生自爲傳。

送陳述之

羸軀抱肺惡。喘甚劇犇豚。水飯輒短氣。矧敢近酒尊。君亦謝嵇阮。力醢不盈分。相看但蕭索。何以慰離羣。往昔各少年。東帶登橋門。白眼霄漢際。冥鴻注孤鶩。我髯今蒼黃。君髮亦翻翻。同吏一州縣。凍螢強相溫。脰頰歲月去。此事更誰怨。願君愛玉體。長使百憂諉。非關易斗粟。政恐耕耘煩。他時老相問。一笑坐忘言。

送徐彥榮

嬋娟水邊楊。宛是涓川竹。光翠相動搖。照我尊酒綠。松風含衆籟。雲月澹華燭。何必簫與鼓。清言媚幽獨。當年妙風致。文采自膏沐。會逢百鍊明。照此燕趙玉。晨風惜行色。車騎喧出宿。一笑如未忘。新詩寓歸僕。送劉貢甫貶衡州

洞庭木葉下。衡陽鴻雁飛。放舟河之水。歲暮以爲期。豈曰無徑路。大直固逶迤。波平弭桂棹。風清捲蘭旗。紫蟹間丹鯉。霜華兼露葵。醉歌塞杜若。還以寄相思。不厭道里遠。所嗟時序移。會登崑崙丘。遂索玄珠遺。以茲鼓枻去。瞻若不可追。乃知體道人。涉世自有宜。入獸不亂羣。安肯陋九夷。如何錄錄者。反笑抱關爲。次黃完仲見寄韻

讀書老無味。記一輒忘十。視昔那得超。但覺有不及。誰能求甚解。拘窘被書熟。爲文亦爾爾。造語取易給。未足解客嘲。況復令鬼泣。柴門一鵲噪。童稚迎信入。開緘故人書。快閱驚喜集。新詩瑩病目。儼若冰玉立。才兼劉柳健。思鄙郊島澀。定從西山來。爽氣扶岌嶭。惠然遠見慰。疑我故閑習。叢臺三晉舊。鎮靜無警急。

府寬郎幕尊。森衛走呼吸。以茲書檄省。頻歲息篇什。神交庶暫對。悅不閔川隰。盧溪白士藪。野處分屣笠。如聞趣歸裝。早作下車揖。吾廬雖庳陋。雅亦便樵汲。無酒或過雄。有酒誰饋餒。何時甲乙第。版築見君葺。比鄰或借倩。梨棗亦得拾。不恥共秃翁。相攜走城邑。

次孫元中至後五日遊蔡氏園韻

林深宜夏炎。亦復便冬冷。居然安穩處。合是招提境。晴煙起屋脊。照日下天井。飽飯策杖出。如行贊公嶺。平生一丘壑。快眼春睡醒。誰言城市喧。能比郊原靜。人間會合少。萬事等泡影。適意不自取。兀立真土梗。時平日月好。歲熟羈旅幸。逢人但懽喜。得酒便酩酊。知我非子誰。頻來不須請。

費家風次韻二首

行年病肺熱。當暑極燔炮。宵分偶小息。起步駐涼颺。咄此怪事發。天北起喧囂。扶搖駕霹靂。萬竅爭怒號。雙耳不及掩。對語何由交。木作麻草拔。瓦如埃壘飄。顛嗽怖欲死。一一驚兒曹。所憂吾其魚。遑賦屋上茅。須臾事亦定。骨肉相勤勞。東方漸杲杲。音響爲誰銷。風雷助神物。茲理古不空。邂逅一夕事。知有費家風。洛橋誦書女。涇川牧羊童。不知費氏子。業力與誰同。便能役蜚廉。頗復鼓豐隆。坐令城郭人。任爾動用中。劍出延平水。竹化葛陂翁。況爾得人趣。變現豈易窮。時時要雨澤。伴客殊未終。勿逢金翅王。非爾能長雄。

子和惠覲佳什。惇敘世契。誦詠感慨。情見乎辭。因次其韻。

恭聞裕陵初。文物萬古先。仁英所造士。臺閣徧招延。堂堂丹陽公。發軔自賓筵。惟我先大夫。整駕亦周旋。一時起接武。千里稱比肩。俱陳曲臺議。共校天祿編。心期久相契。燥濕無改絃。晚登廊廟席。玉笏照華顛。廢馬並飛蓋。齋榻連脩椽。到今啓事帖。尺牘餘藤牋。憶我旣冠後。羣趨集英前。公持柱史橐。水鏡資平銓。謂宜掇上第。擊節稱奏篇。聲名竟寂寂。感遇空拳拳。事過劇脫兔。邇來三十年。翰墨恍未落。拱木森已圓。嗟哉最孤露。罪戾深益纏。迷途雖云指。頑質何由鐫。以茲衆惡歸。白首猶連遭。屢驚流夜郎。敢望尉通泉。絃腸恐齊斷。身壁欲俱捐。豈知巢傾覆。胎卵卻復全。聖主日方中。照曜無黨偏。宸筆下霄漢。一洗空宿愆。生還出望外。喜極悲淚漣。詩書手自束。衣袂輕欲翾。猶憂抱沈瘵。針石久未蠲。竭來問醫藥。蹭蹬淮之壩。追惟曩時樂。夢破無重眠。疇知王公子。但說副車賢。持帶走窮隸。趣駕來飛旂。勞我鬢霜雪。歡顏語嬾娟。北堂太夫人。備福獨繇繇。往者三殿朝。吾親亦班聯。問訊逮妻女。悲歡深愴然。升堂一拜阻。自痛久拘羈。念子事方殷。使客舟車駢。撥忙屢顧盼。尊酒勸留連。新詩又來辱。巨軸星斗懸。七字健欲活。靡靡爭春妍。夷塗取驟驥。武庫出戈鋌。驟聞吳叔辯。霍然病欲痊。感子重拜嘉。儻未溝壑填。西風理歸棹。往稼汝陽田。王塗正清廓。天子仁如天。軒冕豈不好。于我亦青氈。政惟蕭丘火。寒焰寧復燃。亨衢子當騁。願言早著鞭。高閭富令息。贖子亦所憐。世交固未替。更賴清白傳。

秋懷次四姪韻五首

涼颼起天末。倏已掃庭戶。光鮮向時柳。慘淡非其故。鉛華不足恃。美人抱幽素。窮吾分當爾。不爲讀書誤。

行樂北山路。縣力涉逶迤。諸郎騁逸足。掩冉去莫羈。歸坐獨兀兀。糜粥聊自資。狂瀾成止水。吾病真吾師。顯氣日且肅。鳴絃此其時。泠泠矢古音。慷慨不勝悲。翔鷗媚百卉。苦雨何紛披。曲罷自澄寂。霜風皎冰姿。千古柴桑翁。于酒頗能全。絕知閒居樂。雅乏從事賢。傾心禱王母。更欲丐長年。緬思東籬下。想望故悠然。窮簷詎云陋。霜月粲孤明。空山值飢虛。秋菊餐落英。吾衰抱沈瘵。玩物得我生。循分各有適。大公一何平。

學易集卷二

五言古詩

宿靈泉寺二首

石磴排林端。路轉陰嶺滑。側身長風外。凜落天爲闊。冉冉光風浮。金輪起天末。團團芳桂樹。隱隱品之幽。敷坐翳其陰。酌彼飛泉流。絲桐壞友人。寫我心離憂。

滑家橋逢壞舟者有感而作

橋傾若車翻。舟破如瓦解。二禍適相觸。生此大狼狽。齊生海邊人。試吏今得代。鄉閭恍在望。舟楫信所快。頗知大道夷。不避小物礙。撐夫虎豹健。力出馳突外。何其一跌傷。脫若葱與蒯。疾雷不及聽。生理歟焉壞。瓦飛昆陽戰。鶴唳淝水敗。身非呂梁叟。沉沒豈不殆。嬌兒年十五。八歲又其妹。豈伊瞬息間。生死不相賴。死者長已矣。生者心破碎。泣盡繼以血。耳目坐盲瞶。哀哀天無情。曠日爲昏憤。徐觀水中意。波浪自澎湃。我來獨心惻。涕出增感慨。頃年岳陽下。憂患亦顛沛。脰頽萬死中。血肉偶俱在。今此溝澮狹。豈復江湖大。咄汝豈不仁。曾獨與禍會。冥冥倘有主。焚溺甚菹醢。不然遭無辜。神理良汝給。從今十手指。永是後車戒。靈均苦讒舌。穎士厭沈瘵。良時不似昔。努力善自愛。我亦乘小艇。兀兀信所屆。搜求得餘尊。聊以勞疲憊。雖微西江闊。勿厭升斗隘。歌闋從此辭。人生慎行邁。

宴左山二首

閨冬節物晏。十月猶素秋。招提陽岡路。宛在峴山頭。史君有高致。尊酒擅一丘。歎顏動長嘯。松菊含春柔。風清宿霧斷。地迴行潦收。時令將凜落。飛光爲誰留。行飯轉北岡。如登贊公嶺。悠然竟晴日。終比城市永。殘霞澹微照。遙林耿疎影。天空氣象杳。落落見此境。彼哉不自愛。快意烹五鼎。來日苦大難。忘言得深領。

題東道輔懷疏亭二首

逢時樂宜達。既達貴蚤休。東門兩歸客。冉冉不可留。大夫名賢後。出處亦俱優。築室在何許。南郭林塘幽。安車搖佩魚。步屣隨杖鳩。勝日至佳客。懽顏終獻酬。鄙人最樗散。世用一何繆。政以無事身。尊俎常見收。今年掃三徑。近不隔虎丘。欲問杜陵老。來往幾風流。賢哉疏太傅。遺榮歸印綬。當時漢廷臣。未省出其右。進爲豈不能。止足吾所守。驅車曉出關。祖帳已芻狗。惟餘清風在。竹帛端不朽。大夫懷家聲。相望千年後。結廬離城郭。興致寄林藪。華髮映童顏。如公殆無有。何必松與喬。豈弟神所壽。嗟余真漫浪。持是終安取。敢言六百石。固已愧升斗。行當自免去。執謁隨隣叟。縱復無新詩。猶期飲醇酒。但問客如此。亦許登亭否。

秋夜自瀘溪泛舟入澤潏二首

浮舟入浩渺。有楫任逶遲。望迷烟樹合。影迴星漢移。清靜水月界。身到始應知。

山橫染黛碧。波散湧金明。風微葭葦靜。露寒魚鳥驚。絕境不得到。愁隨歸棹生。

舟行懷斯川用王介甫韻

邇往欲何之。緩行聊爾爾。悟身無期會。在彼猶在此。輕舸類短鞍。安取途九軌。所嗟湍流長。汨沒未及已。兼葭鴈鷺澤。清淺良可喜。美人詎云遠。耿耿隔一水。憐我抱沈疴。藥劑厭餘滓。談笑何時來。幽憂賴湔洗。晁端州秀宴席

同寮貴公子。好事敵原嘗。晁侯更蕭散。不愛囊中裝。步兵玉觥滑。洞庭金丸香。宛轉蓴帶細。紛綸鱸縷長。鰈魚三百飮。豈必河之魴。咄嗟事便辦。侍御色不忙。熙熙春臺上。醉語各相忘。湯餅最後出。雖飽別有腸。願君善遇客。懽樂殊未央。不須投車轄。敬舉主人觴。

和梁十登三學閣

屏居倦煩促。約此塵外遊。于我快兩目。云誰翻百憂。蒼山東北秀。野水西南浮。平生林壑心。今老此一丘。悲風入叢薄。掃迹瓜芋疇。高樹未搖落。鼎鼎彌道周。感此節物化。渙忽何當休。幻事涉苦海。禪心得中州。徙倚到無言。風鈴聲更幽。新詩出肺腑。明月非暗投。終篇不及酒。似非我一流。願爲靈泉去。醉語看橫秋。與諸人步郊外作。寄舍弟斯川。

行年踰六十。衰墮百慮休。新春逢佳日。忽漫思出遊。隣曲四五人。風味成一流。步履相後先。散若水上鷗。重城未云遠。乃得此林丘。緬懷斜川人。疎野更無儔。千載今日歡。政爾聊相酬。誰言恨枯槁。茲語當信不。

阿連最領此。欲語翻離憂。寄聲早歸來。二仲須羊求。

夢與舍弟登靈泉。步趨如無疾。既覺感而賦詩。用王介甫韻。

老夫東歸喜。豈復念西悲。心安體當佳。抱病如何其。欲成塞士賦。應作牛人詩。丘園窺不得。溘死恐無時。誰令北山夢。煩惱變衰遲。陟巘石岌岌。班荆草離離。季也遮我留。更與道人期。夢中差獨樂。不類覺時爲。晝夕代乘除。勞逸更共之。我豈不有瘳。陰若相扶持。福雖未盈眚。自怪盛如茨。從今愛吾生。糜粥養蕃滋。

題古器物銘贈得甫兼簡諸友

往者李龍眠。監河國城岸。家多古時器。羅列供客玩。爵觚屢飲我。鼎鬲貯肴膳。到今李侯書。一展如對面。邇來三十載。復向趙卿見。收藏又何富。幕寫粲黃卷。沈酣夏商周。餘嗜到兩漢。銘識文字祖。曾玄成繡篆。頗通蒼雅學。不畏魚魯眩。遂將傳琬琰。索我序且讚。我衰心力薄。游不出里閭。孔懷忘年友。契闊異州縣。深慙千里駕。請畢十日燕。諸賢共留連。更賴三語掾。

見蘇黃邦字韻詩戲示王倅安國二首

時倅欲往督捕

與君南北人。斗粟聚此邦。維彼惡少年。潢池稱下江。白晝射大屋。屋破無完牕。繡衣募壯士。受械不受降。我弱異都盧。豈敢學尋撞。君才過烏獲。九鼎一臂扛。懸金八十萬。何啻白璧雙。胡不騎赤兔。斫樹收死鹿。坐寬刺史憂。不復念政厯。凱旋夾道迎。父老集瓶缸。天下本無事。此語僅興邦。得志不與物。誓心有如江。腐儒若腐瑩。槁死讀書牕。誰能守筆研。心大云何降。

終然氣相許。霜鐘不須撞。道雖千鈞重。努力期自扛。他時僑與札。日月聲名雙。祇應南海趙。便是襄陽龐。慎毋彊揀擇。貴純不貴厯。請見胸中物。止水琉璃缸。

答王允中聖推

長安重行樂。寒食及佳辰。聯翩出遊宴。閭巷無居人。動靜各有趣。拂我朱絲塵。分將幽獨心。守此瀟落身。斯豈衆所然。獨子何殷勤。叩門隨謁入。俯仰色甚真。從容一笑粲。不覺傾蓋新。念昔各從宦。宿毫爲近鄰。溢言相引重。嗟我曾未聞。乃知國寶拙。不悟王綏仁。高談喜未定。佳句意益珍。幾有按劍感。驚怪惠好頻。子方赴吏集。朝暮旅食貧。不忍拜馬足。會且掃朱門。獨肯閒見我。惟子欲何云。乃言人生世。取舍理莫均。譬之平地水。東西南北分。感此重拜嘉。幸子長相親。

答王升之

去家今來歸。川陸萬里長。有官無祿食。生理劇微茫。飢創何時廖。麥隴得扁倉。丁稚八九人。我老自裹糧。不辭終歲勤。一飽幸見償。所願杯棬足。何取玉無當。向來無數青。渾作可憐黃。想見冰玉姿。膏沐出沸湯。誰作不祥語。詛呪甚砭傷。妒人神所呵。坐使天雨霧。翁媼拜相賀。懽欲插翅翔。新詩果來謝。追悔如負芒。君惟文字戲。竿木故逢場。豈顧狷狹人。爲虐變炎涼。且復置是事。釀玉滿君堂。垂涎得涓滴。渴夢轉顛狂。不嫌餅餌惡。雖賤敢獨嘗。交易儻許可。寧復有他腸。且毋火我屋。亦未穴君牆。乘除各醉飽。前事永相忘。

七言古

作蜂室

栽基植篲作蜂室。其陽分孔便出入。懸窠毒螫非爾匹。百卉芳華登股膝。孫息蟬聯深洞房。露結膏凝如截肪。比功九粒冠百味。削滓猶堪資夜光。憐爾于人甚無負。一世分甘身獨苦。高崖熏灼彌更難。且復留連小環堵。

寄晁以道

江東野老羹蓴絲。弗羨肉山酒爲池。啖我故人吏未歸。腳韉手板方苦飢。豈無盤殮真璧圭。我乏是物君非宜。近聞示病作居士。不似齊州稱主司。歲惡無乃饒所爲。自是不當食肉糜。書來中有七字詩。問訊勞苦開人眉。墨丸不減官險麋。著書寂寞來孔時。我曹老矣善自持。莫擬狂瘦勝痴肥。他鄉異縣久別離。明月千里長相思。

送高將永亨

大高殺身如伍尙。弟有子胥天未喪。小高自慕顏太師。能言兄守常山時。事隨日往長已矣。邂逅相逢識其弟。誰言恨不見古人。兩意恐非今人比。結髮行陣初齊名。志同不在同生死。苦遭文吏巧見詆。邊人至今猶墜淚。三年默默趨戎行。驂騑捕鼠非所長。趣裝定返雲中守。上書今遇尙書郎。

次資道韻

今我不樂何所爲。調笑盍各言其好。不願擊水南溟飛。但愛乘風北牕傲。大夫聲名過單父。卽日去受東

朝誥固知爲偶我非齊。莫忘相從君與操。駿辯瑰章殆希有。玉堂金馬應須到。功成卻記雞黍期。同著青鞋映黃帽。

次韻大人正月十四日作

端闌夜許都人望。紅微亭亭坐南向。燭龍影落陸海中。廣樂聲在鈞天上。華嚴寶藏光景出。雙鸞飛下蓬萊嶂。太平天子千萬歲。呼舞共作嵩山唱。小臣踟躕百寮底。未許外班陪末行。今來淪落一何極。山城裝點成窮相。苦吟漫欲酬節物。擁膝句作酸寒狀。搜抉渾如餌毒藥。畏縮更似藏私釀。詩成竟亦勿交涉。欲取樓蘭經樂浪。典衣聊復酤市酒。一飲徑醉成昏忘。黃昏陋巷燈火絕。守把不費城門將。豈不見人生懽樂易生悲。惟有靜默長無量。

隴上遇雨

隴上怕雨竟遇雨。空山路窮避無所。昆陽之戰飛屋瓦。白登之圍矢交下。從者散去馬可憐。故人借我非我馬。上坡歷塊已欲側。下坡流滑攢四腳。旣憤而起倏復顛。墜策失轡心茫然。從者好在無自苦。履穿衣敝吾憤汝。我亦短褐不得完。掛樹一裂長尺五。此生辛勤身不辭。七歲嬌女三歲兒。泥塗模糊啼午飢。買餅一百汝勿啼。漣沱麥飯蕪蕪粥。咄汝豈得長食肉。仰天長嘆冠纓絕。下馬納屨踵亦決。張儀舌在雖自知。范叔衣寒一何切。人生貧賤烏足悲。行吟不顧妻罵隨。寄聲公等勿誚我。富貴莫忘牛衣時。

答純益書懷

矯矯林間鶴。汎汎水際鷗。俱非鼎俎用。斗粟誰爲留。君師蔡義我施讎。同時聲名今白頭。博士弟子動千數。遑記軍中陳與劉。黃金絡馬錦臂鞬。印組丈二鳴八騶。席間設馘竟何味。車上負芒終可憂。人生在世各有趣。江東且復客曹丘。田橫刎頸亦義事。感知捐軀非所羞。此心會與君意合。今無古人何處求。不如置之酌美酒。同郡諸公皆舊游。耳熱眼花付一醉。雞蟲蚌鷸何時休。

重答

君文有如太史遷。多至萬字少千言。小詩未足見馳騁。要當著書名雋永。詞源一深幾千丈。苦恨舉世無長綆。少時白眼視嚴徐。老傍君門冉冉趨。聲價若許金滿斗。倦游銷減一毫無。雖貧終非兒女態。偏強時編虎須食。貧我亦懷抱惡。泰山不毛秋濯濯。麋乾黍空酒味薄。飢死不學東方朔。

以郿條贈晁掾

握手喜相逢。何以贈契闊。解我郿縣墨絲條。繫君南海穀皮褐。結君歡愛君勿忘。祝君玄髮如許長。帶圍莫作沈家令。腰腹須稱東平王。祗憂道人骨相發。王塗駸駸弦上筈。金璽盤綬丙丁文。魚須寶笏摺錦紳。此時此條亦相尙。參禪問道裴丞相。

碾茶

玉川涕泣訟月蝕。蟾蜍無光玳瑁魄。委照墨海鸛鶴石。恐是雲龍小蒼壁。我家得之天人家。天家金盤薦玉食。豈堪書生嗽糠覈。牀頭什襲封未拆。不辭屑玉遺君飲。要君端繡坐肝膈。意中佳句甚了了。口不能

道空脈脈。諸公椽筆好相過。莫道彭城譏水厄。

學易集卷三

五言律詩

寄人

聞道江家宅。椒蘭春自榮。道人今好在。歸馬大遲生。飛鳥山南路。浮雲隴上城。相看各多病。搗藥待君烹。

送成都漕

里巷居偏近。生平月亦同。開懷一笑語。轉首兩西東。共是塵勞內。全輸吏隱中。魚來勤尺素。淮汴古來通。

送東之

受業師高第。居官郡右曹。掾非欒語得。才有鶚書褒。會是人難及。胡然力獨勞。府趨空冉冉。誰得呂虔刀。

送王升之

翩翩捧檄喜。便作放舟行。愛客懷抱好。能詩膚骨清。蹇余身濩落。況此歲崢嶸。自是愁成醉。離觴不復傾。

諸公見過野飯晚步輔之有詩因次其韻

野人城下住。巷底更誰鄰。祇有攜筇路。應無躍馬塵。客非俗士駕。詩似古人淳。載酒催公等。藜羹難重陳。

西溪次韻九首

終年倦城郭。夢入水雲鄉。酒美俱中聖。詩成獨擅場。高風助悲壯。皎月照清狂。露下如鉛水。沾衣笑淚浪。

攜手西溪陌。懽顏共舉觴。雲山滿目靜。風月一襟涼。但得杯中玉。那知鬢後霜。何妨擊尊破。故作聽歌長。
英英數君子。貧甚亦清門。蕭散俱相好。疎慵每見原。玄談得涇渭。芳意有蘭蓀。從此窺名理。金篦刮眼昏。
漁人一竿老。羸軀半飢虛。豈有令鉤直。惟應恨網疎。有時脚不襪。自笑食無魚。我自餘尊在。愁眉爾暫舒。
秋風漲川谷。小汶亦容舸。落照收長纜。隨流試短篙。隔溪聞鼓柁。臨海試觀濤。解賦南州浦。前身何水曹。
洞庭明月下。天地一冰壺。悅對瑤池雪。驚逢甕社珠。窮鄉悲百粵。勝槩憶三吳。誰作稽山伴。秋風入鏡湖。
輕雲巧迎月。高柳媚疎光。城堞傳嚴鼓。尊罍動急觴。望迷山四面。影占水中央。清絕無人地。居然五友鄉。
幽人若幽鳥。適意但卑飛。官拙羞潘岳。才多笑陸機。不堪尸馬革。幸未泣牛衣。來往瀟溪上。鄰翁有釣磯。
柯亭三弄笛。慄栗易悲風。妙曲來天上。飛花落酒中。翠屏虛在望。玉鏡迴當空。摹寫何人解。王維老畫工。

次畢將叔韻寄壽陽三首

撫枕得滂湃。開軒延翠微。乃翁故時客。何許更言歸。有興添書滴。無心傍釣磯。惟應一大事。策杖到禪扉。
苦竹溢江宅。黃山秋浦亭。猿聲作頭白。客淚對衫青。笑爾悲羸脰。知吾寄水萍。時時賴嚴尹。小隊出郊坰。
丈人文力健。能事與心違。彭澤秫田少。襄陽菰菜肥。紫團生雪液。蒼餅破雲衣。持許無人寄。慙慙小陟歸。

題張氏園亭二首

蒼頭奉筇竹。稚子試春衫。共著野人服。來遊居士巖。園蔬佐酒碗。藥錄貯書函。草草非難得。從今不計凡。
岸薺隨漁屨。林桃映舞衫。定非銅雀樹。似是雨花巖。儻有家千指。書多日百函。斯人太高語。吾意祇塵凡。

與李深梁山泊分韻得輕風生浪遲五首

大澤水常滿。秋來洲渚平。游鱗不能渡。短棹若驚行。氣吐西江蜃。風搏北海鵬。波濤未可料。汨沒恐身輕。從今魚易得。居與水相通。世事青天外。生涯高浪中。蒲深疑落日。萍轉覺回風。勸爾終身計。鴟夷是范公。爲問風多逆。舟行太緩生。漁歌不用調。水宿莫論程。飽有雕胡飯。香無錦帶羹。相看乏酒飲。愁劇似淵明。莊生語逍遙。元子稱漫浪。此身如土梗。雕刻不成樣。何心解賓戲。猶欲避官謗。默默難具論。幽愁浩盈望。丹鳳不出世。整翮上林枝。黃鵠非所擬。翔集偶爲期。風高不易到。歲晏仍苦飢。扶持幸有托。敢厭路逶遲。

舟中二首

野水今年長。青田入白湖。鄉音聞驛馬。風力驗檣烏。永夜眠雖著。高秋病未蘇。常憂北山拜。辛苦倩人扶。故國風烟外。飄零隔歲淹。今茲去拘窘。行復見安恬。未擬親酒盞。何當疎藥盞。酬恩無處所。香火供瞿聃。使遼作十四首

自昔和戎便。于今出使光。邊烽宵不見。漢節歲相望。州邑三餐遍。溝封一葦航。太平無險固。道德是金湯。虎北奚南迴。居然帶礪全。百尋天上樹。千里掌中川。毳幕宜逃漢。山戎莫病燕。卽今甌脫地。渾占兩河田。禮爲王人重。關亭道路除。荒城初部落。名鎮古巫閭。習俗便乘馬。生男薄負鋤。傳聞斷腕地。歲歲作樓居。但逐銀脾使。何堪記驛程。路迷如欲盡。山轉忽通行。列仗東丹騎。先驅渤海兵。鑿空誰計此。曾未及長纓。寒日川原暗。顛風草木昏。捉襟愁肘見。語客畏聲吞。曠蕩疑人少。倉皇覺馬奔。勿驚銷腠肉。長遣節旄存。

神水堅冰合。沙場寸草無。長疑淚是血。誤喜唾成珠。畫出驚貂鼠。宵鳴厭訓狐。悲歌人不應。自覺寸心孤。
北嶺能捫斗。南崗欲摘星。舊聞空耳滿。異域得身經。好築嫫媧塚。仍刊車騎銘。莫言天作限。關路有松亭。
鼓角霜初曉。簫笳日欲曛。莫爲天外意。只作夢中聞。問道無人迹。嘶風有馬羣。山高飛鳥急。決背入層雲。
一作重山去。頻看破鏡飛。長悲青塚怨。莫忘白登圍。禮覺周旋異。心知笑語非。南飛何處鳥。安得與俱歸。
喜關人皆勇。誅求俗故貪。爲謀不耐暑。嗜味獨便鹽。已怪今生到。寧能一夕淹。長安遠如日。北斗望爲南。
今日朝元仗。千官兩掖門。從容魚藻宴。供奉柏梁尊。厭服貂裘敝。愁看桂酒溫。誰知廣文淀。水面箔爲藩。
置酒穹廕曉。僧山合管絃。應緣地褊小。難遣舞回旋。風急皮毛重。霜清漣酪羶。君看東嚮坐。貴重盡童顛。
王春今日是。北歷自相忘。厭食乾羊味。如聞生菜香。隴梅渾破臘。燕鴈正隨陽。時節催歸興。憑陵天際翔。
此歷立春
差一日

病中

日覺筋骸耗。中宵慘未寧。厭看山濯濯。快見柏青青。記里無官堠。依身有短亭。心驚此何地。生死一流萍。
病如漳浦臥。一腹果然浮。不著三升飯。能容萬斛愁。水聲回別浦。山影到中流。遣興須憑酒。慙慙爲汝留。
曹紘陷交趾。十七年與其母逃歸。得官汶上。求詩。

曹侯將家子。異域久飄飄。人獨憂羝乳。天方借海橋。亡弓終在楚。去鶴會歸遼。凜凜今如許。風霜看後凋。
答景亮二首

門無車馬迹。臥榻兩閒人。野服風前薄。園蔬雨後新。絲桐叔夜操。香火淨名真。斜日穿簷入。悠悠對隙塵。
吾廬亦自愛。況屬仲春中。賓榻疎簾隔。鄰園小徑通。何妨書裘亂。未遽酒尊空。更約高人過。當軒看偃松。

七夕

夜永風露下。庭空簾幕秋。盃盤延素魄。針縷動雙眸。天上祇今夕。人間寧少留。如何一水際。歲歲此相求。

五言排律

寄贈

絕世丹青業。中臺雨露辰。師門推上第。王室見名臣。磊落儒林丈。風流畫省賓。燕朝分錦仗。僊直近楓宸。
鳴鳳丹山穴。占星潁水濱。殿廬俄厭直。藩社此班春。山節還銅虎。京符換玉麟。威行三輔地。歌浹兩川民。
已喜徵黃霸。無勞借寇恂。卽應公簡上。會見俗還淳。歎昔時難偶。逢今勢莫均。楚材難入管。漢法近沿秦。
稽古皆前列。希風絕後塵。斯文如汨沒。吾道久湮淪。海嶽功歸聖。熊羆釣有人。藍田仍產玉。郢匠早揮斤。
周歷方開永。蕭規欲盡循。天時知會遇。人力漫紛綸。夙有摻絃便。今逢斂板親。猥慙牛下走。敢玷席中珍。
迹遠龍門峻。心懷燕廈仁。緒言聞已舊。從此更書紳。

答資道

都尉聲名後。篇章不乏才。談高正始際。詩自建安來。險怪探龍額。甘珍味豹胎。陰何長有思。郊島漫相猜。
白雪憑誰聽。黃花入衆吟。楚醒寧水薜。蜀興動官梅。晚艇翩翩鳥。秋濤隱隱雷。水兼天浩蕩。山爲日崔嵬。

麗藻煩三復。愁腸殆九回。自慙無世用。莊語笑迂駘。

七夕戲效西崑體

終年情脈脈。此夕夜遲遲。玉宇秋來闌。珠簾夜後宜。仙娥月爲姊。海實樹生兒。露共雲車下。風將鵲扇移。蛟盤空有淚。椽筆未成詩。借取揮戈使。金釭更百枝。

七言律詩

寄葉勤次其韻

五斗折腰俱爲貧。詩書律令若爲分。西山今朝有爽氣。北闕無時飛白雲。一紙綢繆三歲字。七言慄慄九章文。故人好在長相憶。悵望江皋麋鹿羣。

送趙侯思恭

西城冠蓋日初曛。南浦笙歌夜嚮晨。何許煙波千頃隔。爾來霜月一鉤新。名花只許平泉有。開讌誰如北海頻。我亦尊前舊時客。獨將衰白臥漳濱。

用公允韻送介叔東歸

曾曳長裾何處門。楚聲悲壯不堪聞。侵陵急景東都雪。觸忤新愁南浦雲。未信書生歌嶽嶽。要令天子禪云云。少年持許今安在。拭目翺翔鷺鷥羣。

次王彥昭寄蘇景謨青社園亭韻二首

承祿分曹付舊規。翩翩文彩妙當時。何人誤讀雌霓賦。他日眞成幼婦碑。曲水流觴如故事。平山行樂有新詩。春來想見棠陰盛。可但詩人別後思。

誰道前賢迹已塵。園林氣象邇來新。高山流水有深意。翠竹黃花如故人。小隊郊垌時訪客。後堂歌吹獨留賓。汶陽寂寞無佳賞。臥閣蕭然過一春。

涵輝閣次韻

光風冉冉動平湖。花草幽香滿坐隅。薰暖頗如權伯在。蕭閒宜與此君俱。可無剡水乘舟興。端是郊居作賦圖。借與禪翁有幽事。一支筇竹倚圓蒲。

行次長風沙次韻

青晨喜氣動江流。兩見新篇到小舟。石裂崖頰非快意。風聲鶴唳亦消憂。已令雙鯉隨梅使。更不飛鳥倚柁樓。興味從今得嘉境。著書應不號窮愁。

遊白雲山次韻二首

不到山中寧久如。兩日闕然或闊疎。每憐身留只意往。何事子行令我居。莫向山僧疑入定。但從溪友試觀漁。朝來新作幾兩屐。更待西原春雨餘。數子讀書渾欲狂。深山縱汝共徜徉。千鈞脚力有底健。萬丈心情如許長。對景吟哦亦有意。逢人笑傲若無旁。幽花細草何足賞。歲歲天邊仙桂芳。

次孫君汝弼晚步韻

寂寥誰過仲宣樓。邂逅斯人肯小留。多病兒童便食粥。忘機鷗鳥共臨流。賦成擬學張平子。志大空慙馬少游。載酒從今相煖熱。著書應不號窮愁。

張大年覽文與可墨竹及先人所題與可挽詩見惠長句因次其韻

墨妙蒼筤雙玉枝。寶音悲壯七哀詩。多慙寂寞青氈地。又得風流黃絹詞。往事白楊無數拱。餘生衰鬢不堪垂。聲沈影絕何人識。賴有柯亭可見思。

次介叔韻

酒船定向江東去。知有風流賀季真。北嶺南崗元自熟。短楊高柳邇來新。老吾官職渾無味。壯子文章最有神。知欲絃歌且三徑。徵君莫自傍風塵。

次胡仲道韻并簡公允弟

幾年書不到江東。知我忘形事事慵。南阮最貧方遠宦。阿連同調且相從。狂生肯信原非病。妄校須慙廣未封。安得論文如定力。不眠長聽五更鐘。

次大人二月三日過吳德仁韻二首

溪上高人稱福吳。一尊深喜共爲娛。步行可是困公子。日晏不應驕灌夫。縱履全勝驅下澤。緩歌長欲聽提壺。行年八十心如水。正覺公非嵇阮徒。

一一郊原春事催。客愁今日爲君開。柳枝鶯鴂未成舞。溪面葡萄初潑醅。曲水使應詩句滿。稽山那復酒船迴。海棠徑裏紋楸石。爲爾從今得得來。

次寶子野韻

不辭身熱野田風。水引膏環入眼中。麴米顧公多樂事。鉏犁憐我有深功。博聞可但百間屋。愛客未嫌三斗葱。天麥毒人安敢獻。莫令堂上一尊空。

次黃完仲韻

幾年流落喜東歸。笑語相懽此一時。轆轤小車真快意。伶俜短杖且扶危。新詩遣興幾成癖。濁酒忘懷定不疑。政恐爲官拋我去。除書聞已下京師。

題僧道誠應緣菴用李端叔韻

歷歷孤寒不可羣。應緣聊寄夢中身。無絃琴裏本來曲。枯木巖前元自春。詩句已多猶恐少。禪機雖舊不妨新。鄉山更好莫歸去。且作蒲團夜坐人。

惠山寺

從來未到山頭寺。應在武陵深處藏。漢水丈人生自拙。香山居士興何長。四旁島嶼娟娟綠。萬頃菰蒲靡靡香。且醉尊中眼前物。瀛洲蓬島兩微茫。

龍山寺

曉色翩翩烏帽輕。道人瞥去不關情。高山流水爲誰說。翠竹黃花空自生。急雨欲來先暑氣。涼風已過卻秋聲。後期好取歸時月。照我深崑處處行。

又泛西溪

春晚西溪入勝游。白楊花亂綠波浮。欲延笑語遲行酒。要盡溪山緩放舟。灘上時看魚撥刺。林間靜聽鳥鉤輈。年來偷活干戈際。強把閒吟寫我憂。

題半隱堂

一堂圖籍自陶冶。三徑蕭蘭俱歲華。定非平恩許侯宅。會是仲長公理家。端居雅不煩摒擋。佳設頗嘗成咄嗟。惟我身閒數來往。徽絃一泛卽生涯。

和長歷賦紙閣用王介甫韻

頂還平直得中方。肯作僧庵半夜牀。脫帽不憂風栗烈。熾爐仍助日蒼涼。賞音正自鳴琴便。宴坐何辭問疾妨。我有陟釐三百幅。禦冬真欲倒歸囊。

和石友

卜居無賴款郊扉。忽忽春還樂事微。莫道身貧非是病。由來人瘦不知肥。謹呼豈肯觴三爵。落魄誰如帶十圍。富貴功名更誰是。且來同醉莫相違。

和曾存之約遊北園

主家韋曲小桃溪。客有詩名杜拾遺。煮酒未成逃暑飲。夾衣猶及惜花時。樾間日下潭潭蓋。蘋末風生寸寸漪。一醉百篇供草聖。主人拚取墨爲池。

和王景亮席上

兒曹付汝莫相關。來伴詩翁作醉顏。花似有情憐客老。竹應無意惜春還。已憑玉塵消爐篆。不怕金輪照屋山。尊俎重開定何日。北溪流水正回環。

東南秀羅亦佳山。而近用前韻約遊。

邂逅飛蓬身事輕。異鄉風物不勝情。出無輿馬自憐許。食有鼈魚空瘦生。失路漫漫迷日影。並溪瀝瀝灌田聲。似聞更有佳山在。試卜東南十里行。

答尹彌爾

門巷相看經幾時。重來新事如弈碁。從今碌碌自我拙。爾後錚錚非子誰。每驚咳唾盡珠玉。定有錦繡生肝脾。人生蓋棺事乃已。一笑一嘯安足悲。

答劉槩石像

春來深覺境翛然。幽鳥簷頭接翅眠。落寞久知身是夢。安閒更喜日如年。江山南國樓臺外。桃李東風錦繡邊。野興暫成沂水浴。故人盍駕越溪船。

贈秦帥吳子中

河嶽根源稟植堅。金行鼎鼎應弧懸。執珪阿閣三階上。建雥元戎十乘前。都護已高延壽最。中朝深記弱翁賢。從今看似張丞相。富貴康強一百年。

重葺前堂。榜曰學易。景亮六丈寵惠新詩。謹賦二詩上謝。

並舍荒蕪三四尋。稍營軒檻便幽深。已將種木待休影。未暇攤書聊洗心。投老篇章愁脈脈。隨緣香火靜惺惺。從今掃灑供雞黍。知有高人肯見臨。

草堂門徑邇來通。好事何人肯過雄。故與圖書爲伴侶。可無風月到簾櫳。生平適意絲桐內。老去忘懷麴米中。感激新詩百金重。貧裝從此不憂空。

舍弟寄茶

吾弟餉人真不惡。建芽來自禁煙前。一杯未易陽侯厄。四兩應爲蒙頂仙。病子頭風如得藥。酒家中聖殆忘眠。平頭奴子堪餅碗。可帶樵青竹葉煎。

遣懷

此身爲客幾東西。萬物須于一馬齊。山色不隨春草綠。邊聲長伴夜烏啼。宦遊碌碌憑誰記。簿領紛紛爲底迷。猶喜官輕無局事。不妨酣寢過晨雞。

學易集卷四

五言絕句

坐進庵戲作

自吾營此庵。遷徙屢有無。壁間故人文。今獨與我俱。
結以不根茅。闔之無鑰鎖。堅密烏有身。非坐常宴坐。
圓蒲與方竹。伴我守幽閒。夜闌得禪趣。明月窺窗間。

王升之絕句。以詩成有共賦。酒熟無孤斟爲韻。因次其韻。

端居得韻語。不作涼秋悲。快若彈丸轉。知是王家詩。
之人嫺辭令。病起猶越聲。不量蒼蒼鬢。屬和愁僅成。
客來問玄解。付與尊中友。我口不能言。此間甚多有。
欲逃蘇晉禪。苦乏陽城俸。鄰家稱子貧。杯酌與君共。
憶昨艘機間。月白雲水暮。妙語同賞心。請君來重賦。
且無遽典衣。素書堪下酒。旋斲金鈴黃。栽軒媚重九。
念當歲嶢嶸。少別友中玉。夢寐大刀頭。安得盧橘熟。

霜蟹豐雨螯。磊落登盤盂。麀麀倦咀嚼。繫我愁獨無。
庭堦脫葉靜。岌岌高井梧。鴈聲排雲去。歷歷心不孤。
夜寒慘不寐。起坐彈鳴琴。之人邈雲漢。空盃難獨斟。

梅徑

幸蒙託根地。歷歷令著行。莫遣桃李妖。壓我玉雪香。
葵軒

朝瞰媚花木。戶牖延榮光。新沐晞我髮。悠然成坐忘。
竹里亭

雖無自家池。竹是九之一。新萌如許長。來歲障夏日。

藜杖

雨衣類襜褕。野屨號不借。扶此枯藜根。行田北山下。
學易堂作

幽居澹無營。飽食心晏如。老不任作務。讀我少時書。

七言絕句

和張赴供備

騎曲休歌出寒愁。渥洼名馬鸛鵲裘。文章不暇三冬足。骨相由來萬戶侯。
桓桓壯氣敵陽秋。冒雪衝風不被裘。天子方修上林苑。戎王莫怕義陽侯。

和初到嶺二絕

到後渾如痛定時。不辭追賦道中詩。趁虛糴米非閒事。莫倚文章堪療飢。
欲語吞聲且復休。異鄉風物伴牢愁。鉛華不爲無人識。獨自妝成卻自羞。

玉簪花和希純

有香無色不因春。端是書生席上珍。同作薺鹽賦詩客。定非歌舞賞花人。
根移少日便花開。數子殷勤手自培。更翦素衣成鶴氅。王恭定向雪中來。
玉簪花開動玉宸。唐昌觀裏夜逢真。仙人瓊卉初無比。直恐芳心卻未申。
鳳尾成陰蕉葉重。金鈿相對菊花繁。真悲舉世無相識。佩蕙紉蘭有屈原。
孤潔偏因霜露成。春花無數不知名。祇應新沐彈冠客。要爾相宜一倍清。
日日花前醉賦詩。多情休誦北山移。沾巾不要時人學。獨爲秋香插一枝。
姑射山前舊約非。秋風滿意未成歸。仙人一去無留迹。墮珥遺簪作雪飛。
藍田故有他山錯。瑤旒瓊旒碧玉干。左紫姚黃滿金谷。野人留取伴雞冠。

贈王安國芍藥

羣花銷盡獨芳菲。淡沐輕膏知爲誰。寂寞書生久無意。風流別駕合相知。

相州州園

解鞍休馬暫蕭然。雖晚猶堪一醉眠。所到園林且爲主。若須吾有是何年。

又泛西溪詩十首

溪小纔容舴艋舟。一樽聊復寄春流。縱橫不用施篙棹。自在教隨水上鷗。
溪頭青草弄春柔。一帶花開動客愁。貪看波中錦紋石。不知船已過芳洲。
春水微生放鷁初。和風習習日舒舒。洲前且爲停輕楫。待摘萋蒿煮白魚。
扁舟如箭過前灣。飛鷺多情送我還。張起片帆風正急。回頭已失蔡公山。
天生橋畔水交流。夾岸花飛逐客舟。時聽山禽歌一曲。何須吹笛舞涼州。
下瀨忽驚花滿樹。踏舟常恐酒盃翻。鼻頭只怪香風遠。知是行過桃李村。
寒沙如雪水如藍。歌嘯中流響半聒。祇恐驪龍驚睡覺。呼風吹浪濺春衫。
春樹連山水浸雲。櫓歌初奏浪花分。溪神爲我添風色。十里歸來日未曛。
淡淡春煙夕照微。渡頭已覺行人稀。玉罇未盡賓朋意。兩槳何妨待月歸。
岸邊漸長陶潛菊。洛畔初生柳惲蘋。自學操舟狎清泚。從今休笑往來頻。

次黃富道覓山釀韻

深巖窮谷自涓涓。慙愧詩情卻泫然。政使家貧無麴米。猶堪烹作惠山泉。
寄張竦

張侯生意祇如瓶。出入艱難亦自成。卻縱鴟夷差獨樂。此中何物不堪盛。
和定國湖上

溪光涵影碧蕭蕭。四合深林不見梢。寒暑若言無避處。世間那有況雲巢。
雨過松篁多樣翠。風迴蘋藻一般香。玉蘭桃李非無意。興味由來靜處長。
菰蒲深處水藏波。邂逅相忘自嘯歌。曳組懸龜知底用。水邊消得一漁蓑。
酤酒添庖趁晚飢。冷淘堆碗照銀絲。羹芹有意無由獻。此味君王恐未知。
鸕鶿鷗鷺樂更真。夷猶溪水碧鄰鄰。全如傲世佳公子。泛泛波間不可親。
盤中璧粒試垂綸。與子應非臧丈人。渭水何須笑溫水。絕勝憔悴楚江濱。
夜坐示兒姪

露下天高秋氣清。北書不到鴈無情。且將款曲終今夕。遮莫鄰雞下五更。
尊香輕泛數枝菊。豈獨春風一一回。自憐寒律窮途客。不恨飄零卻恨開。
戲示語道

御史青驄持望重。將軍赤兔得勳多。乘黃驥叢今相見。垓下烏騅奈若何。

麥壘

麥壘漫漫宿蘂黃。新苗寸寸未經霜。手中馬箠餘三尺。想見歸時如許長。

次韻智夫并呈庭誨

爲問尊前醉阿誰。韓娥應囀縷金衣。何須料理沙邊客。更遣梁塵作雪飛。臥隨編草依龜背。行踏冰泥上馬埧。卻望高城在天上。故知李郭是仙人。

答景亮

十札新詩忽見投。筆端高興不能休。願將筋力如公比。安得耽書到白頭。

以茶寄安國

苦茗槍旗誠鄙甚。密雲龍鳳太高生。一甌爲寄忘年友。此味應須識此情。

闕題

君家十畝春蒼筤。犀株解籜冰玉香。山東麥飯藜羹客。有底詩情合得嘗。

先寄左軍語道

已喜仲容連騎去。更思小陸度山來。賦槐白土愁顏甚。喚取溪傍一笑開。

咏呂步舒詩

先生卵翼計平生。針芥相睽禍欲成。自是揮斤非妙手。郢人爲質卻無情。

繙書見舍弟。去年自壽歸鄆道中詩。悵然懷想。久不作詩。因集句爲答。用涓城體可歌也。
春深逐客一浮萍。何處淹留白髮生。山城過雨百花盡。野渡無人舟自橫。
青春白日坐消難。須著人間比夢間。八公山下清淮水。明月何時照我還。
汶陽歸客淚沾巾。莫厭傷多酒入唇。暫時相見還相送。水遠山長愁殺人。
荒山野水照斜暉。綠淨春深好染衣。請君問取東流水。來歲如今歸未歸。
尋思百計不如閒。寒馬重來事偶然。皇恩若許歸田去。頭白昏昏只醉眠。
詩成吟詠轉淒涼。獨宿空簾歸夢長。長年事事皆拋盡。惟到尊前是故鄉。

重送成都

曾遊淮上愛清流。況子官爲郡督郵。可賀呂虔賢太守。佩刀應得不須求。

口號

孟仲爭秋毒熱新。自今三指算歸旬。已判明月隔千里。可對茱萸少一人。
面目已憑詩寄去。笑談須待自將來。香泉不煮雙金榼。候取歸人趁菊開。

闕題

北堂手種藍田玉。采斲不隨薑芋疇。邇來留得花爲佩。付與吳儂可療愁。

又景亮惠藜杖賦絕句以謝

藜根矯矯似枯松。扶我蹒跚病力窮。置几賜餐非所望。康寧願學樂全翁。
銀角桃枝空有賦。鐵根藜杖可無詩。從今客到迎門待。還我維摩未病時。

張辟疆

老書駁駁不可攀。風流依約片言還。小兒若悟他年事。肯使生心涕淚間。

覓竹示子勉

爲覓新篁雪後移。殷懃都莫遺根知。道人要作騎龍杖。與子相從到葛陂。

和公度

多情佳客送春來。雉尾貓頭次第栽。從此庭前共蒼翠。天桃繁杏不須開。

松石

長茂用武子流沙作松石。旣成示予。而武子來請作小詩歸之。并簡長茂。

筆端陶冶不無神。紙面流沙秋後雲。點破沙痕便成水。一溪松石浪沄沄。
向來愛鼎已成癖。今日還書真是癡。不分多求董威輦。只應重老李咸熙。

恩赦放還集句先寄鄉中弟姪三首

去年當日別東都。魚鳥猶疑畏簡書。詔恩許逐陽和至。只向長沙住歲餘。
櫓聲衝雨似鳴機。終日思歸此日歸。自爲野客尋幽慣。不用登臨歎落暉。

閒思往事似前身羞見黃花無數新我家孤姪在海浦遍插茱萸少一人

